

Ñoquiansundeccu

Jueces

Josué pasi ccase israendeccu Na'su Chigama pañambipa tisu in'janqquia'caen egae canse'fa. Tsa'cansi Na'su antte cuintsu iyiccosundeccu jipa israendeccumma patsuye. Tsa'ma israendeccu tsa'caen patsuyepa vana'ñaccasi Na'su Chigaja ccushaensundeccumma moe'jen. Tsendeccu ñoquiansundeccuve can'jemba israendeccumma angacansi ccase tsu Na'su Chigama iñajan'fa.

Josué pa'cho

2 ⁶Josuéja israendeccumma can moesi poiyl'cco tisupa isuya'cho andenga isuye jaja'fa. ⁷Josué toya cansuite tsu poiyl'cco israendeccuja Na'su Chigama iñajamba can'jen'fa. Toya'caen Josué pa'ninda tisei'ccu coenzandeccu toya cansuite tsu tsa'caen Na'su Chigama iñajan'fa. Nane tsendeccu poiyl'cco tsu Na'su osha'cho israendeccumga ñotsse tson'jen'choma attepa in'jan'chondeccu. ⁸Tsa'ma Josuéja ciento diez canque'fave an'biamba pa. ⁹Pasi tisu andenga tisema a'tu'fa. Tsa Timnat-sera andeni tsu Efraín ande'su Gaas ccotta'cconi nortefanga jincho. ¹⁰Poiyl'cco Josuéi'ccu fae'ngae israe'su coenzandeccu'qqe pa'fa. Tise'pa pa'fasi omboc can'jensundeccuja Na'su Chigama atesumbipa tise israendeccumga ñotsse tson'jen'choma'qqe atesu'fambi.

Israendeccu Na'su Chigama cati'cho

¹¹Tsa'ma israendeccu egae tsinconsi Na'su atte'ma in'jambi. Nane israendeccuja osha'cho chiga Baal ñoña'choma iñajañe ashaen'fa. ¹²Na'su, tise'pa tayopisundeccumma Egipto'ye somboensi in'jan'cho Chigama catipa pporotsse canjensundeccumbe chigandeccumma iñajan'jen'fa. Tsa'caen tsonsi Na'su Chigaja tise'pama iyicca'ye. ¹³Nane Na'suma catipa chiga Baal toya'caen osha'cho chiga Astarté ñoña'choma'qqe iñajan'fa. ¹⁴Tsa'caen tson'fasi Na'su Chigaja tise'pama iyicca'yepa antte cuintsu ccanambandeccu jipa osha'choma cca'nasi tise'pa pporotsse canjen'su iyiccosundeccu'qqe jisi oshambi'e dapa patsuye'faye. ¹⁵Iyiccosundeccumma iyiccocoye ja'fa'ninda Na'su'qqe tise'pama se'pi. Nane Na'su tayo condaquia'caen se'pisi tsu patsuye'fa.

Tsa'ma tsa'caen vana'jen'fa'a'qqe ¹⁶Na'su Chigaja ñoquiansundeccumma anttepa moe cuintsu israendeccumma angacamba tise'pa iyiccosundeccu'ye ccushaeñe. ¹⁷Tsa'ma israendeccuja ñoquiansundeccumma ñotsse paña'fambi. Pañambipa Na'suma catipa faesu chigandeccumma inñajan'jen'fa. Nane tise'pa tayopisundeccu Na'su manda'choma pañamba canseqquia'caen canse'fambi. ¹⁸Faesu aindecu israendeccumma patsusi vana'jen'ninda tsu Na'su Chigaja tise'pa ina'jen'choma pañamba tise'pama mende'ye. Mede'yepa ñoquian'suma ccutsiamba fuite cuintsu tsambe cansuite israendeccumma tise'pa iyiccosundeccu'ye ccushaeñe. ¹⁹Tsa'ma tise'pa manda'su pasi aindecu ccase egae tsincomba tise'pa tayopisundeccumma bove egae dapa faesu chigandeccumma inñajamba canse'fa. Nane anttembe'yi egae tsincomba tsosinambie dapa Na'suma pañañe in'jan'fambi. ²⁰Tsa'caen canse'fasi Na'su Chiga ti'tsse tise'pama iyicca'yepa su: "Tayopi'su israendeccu'ccu gi fae'ngae injancco'fa'choma afa. Tsa'ma va, tise'pa dushundeccu, tsama catipa ñama pañambisi gi ²¹ti'tsse tise'pama fuiteya'bi. Nane Josué pasi toya va andeni joqqitssimbi'chondeccuma gi joqqitssiaña'bi." ²²Na'suja tsa'caen ante israendeccu tsendeccu'ccu fae'ngae can'jemba ma'caen tsoña'choma atesuye; nane tise'pa tayopisundecquia'caen Na'su Chigama pañañe, tsambi'ta pañambi'choave atesuye. ²³Tsa'caen atesuye in'jamba Na'suja tsa andeni canjensundeccumma junde joqqitssiambi. Nane poiyl'cco Josué patsumbisi can'jen'chondeccuma toya can'jeñe ante.

Ñoquian'su Otoniel

3 ⁷Israendeccu egae tsincon'fasi Na'su Chigaja atte'ma in'jambi. Nane Na'suma aqqe'papa osha'cho chiga Baal toya'caen chiga Astarté ñoña'choma inñajan'jen'fa. ⁸Tsa'caen tson'fasi Na'su Chiga tise'pama iyicca'yepa ante cuintsu Mesopotamia'su na'su, Cusan-risataim, tise'pama patsuye. Nane patsusi tsu ocho canque'fave israendeccuja tisema pañamba sema'jen'fa. ⁹Tsa'caen vana'jemba Na'su Chigama inñajan'ninda Na'suja ñoquian'suma ccutsian tise'pama ccushaeñe. Ñoquian'su tsu Cenaz dutssi'ye, Otoniel. (Cenaz tsu Caleb quinshin.) ¹⁰Na'su Chiga Qquendya'pa Otonielma in'jaensi israendeccumma angacan. Tsa'caen israendeccu Cusan-risataima iyiccoye ja'fasi Na'su tise'pama fuite cuintsu patsu'faye. ¹¹Tsa'caen patsupa cuarenta canque'fave ñotsse opatsse canse'fa.

Aod Moab'ye ccushaen'cho

Otoniel pasi ¹²israendeccu ccase egae tsincon'fasi Na'su Chiga atte'ma in'jambi. In'jambipa iyicca'yepa ante cuintsu Moab na'su, Eglón, israelma ti'tsse quin'ame daye. ¹³Quin'ame dapa Eglónja amonitandeccu'ccu amalecitandeccu'ccu'qqe fae'ngae fuitecco'fa'chove afapa israendeccu'ccu geraen'fa. Geraemba Jericó canquema patsusi ¹⁴israendeccuja diez y ocho canque'fave Eglónma pañamba sema'jen'fa. ¹⁵Tsa'caen vanamba can'jemba Na'su Chigama inñajan'ninda tsu ñoquian'suma ccutsian israendeccumma ccushaeñe. Tsaja Benjamín aindecu'su Gera dutssi'ye, Aod. Aodja pavefa'su a'i.

Chiga Gedeónma ttu'se'cho

6 ¹Ccase tsu israendeccuja Na'su Chigama catipa egae tsincon'fa. Tsa'caen egae tsincon'fasi Na'suja siete canque'fave antte cuintu madiandeccu israendeccum patsusi vana'faye. ²Tsa'caen madiandeccu ti'tsse patsuña accapa ti'tsse vanaña'fasi israendeccuja ccotta'cco'su changoni a'tutsse tisupa can'jeña'chove ñoña'fa. ³Israendeccu tisupa anque'suve jon'fani'qqe junde tsu madiandeccu amalecitandecu'ccu toya'caen faesu chiga sombo'jefa'su aindecu'qqe jipa ⁴Israel andeni can'jemba israendeccu jon'choma daño'fa. Nane Gazapie tsa'caen dañomba ni fae cansian jinchove antte'fambi israendeccu cansey'a'chove. Poi oveja, vaura toya'caen boroma'qqe tsumbe anga'fa. ⁵Tsomba tise'pa aña'choi'ccu jipa carpama ccutsutsian'fa pa'cco andema pi'cco'tsse. Nane tsendeccu toya'caen tise'pa cameyo'qqe agattoye oshambi'tssi. Pa'cco andema sefaemba dañone ji'fa. ⁶Madiandeccu tsa'caen vana'e'jensi tsu israendeccuja Na'su Chigama fundopa ñajan'fa cuintu tise'pama fuitete.

⁷Israendeccu tsa'caen Na'su Chigama ñajansi ⁸Na'suja tise aya'fama afa'suma moesi qqen su: “Qquen tsu Na'su israendecumbe Chigaja su: ‘Ña gi Egipto'ye que'ima somboen'su, tsa que'i tsangae sema'suve da'cho ande'ye. ⁹Nane egiptondeccu manda'cho'ye itsapa que'ima vanaesundeccu'ye'qqe que'ima ccushaen. Que'ima o'tie jacamba gi tsendeccum tteya mañamba tise'pa andema que'inga afe. ¹⁰Toya'caen gi que'inga su: Ña gi Na'su que'i Chiga. Tsa'cansi ja'ño amorreondeccu andeni can'jen'an'qqe tise'pa chigandeccum ñajan'fajama. Tsa'ma que'ija ñama paña'fambi.’”

¹¹Tsonsi Na'su Chigama sefacconi'su shondo'suja Ofra canqueni jipa Joásme roble quini'jin'su tumbianccuni dyai. Tsa Joás tsu Abiezer'su a'i. Tse'tti roble jin'tti tsu Joás dutssi'ye Gedeónjan vino tsa'ccuve somboen'jen'cho changonga ca'ni ccutsupa trigoma qqesho'je madiandeccu tisema atte'fasa'ne. ¹²Tsa'caen qqesho'jesi Na'su Chigama sefacconi'su shondo'suja tisenga attiamba su:

—¡Na'su Chiga quei'ccu can'jensi queja ñoa'me quin'an sundaro qui!

¹³Pañamba Gedeónjan su:

—Na'su ñoa'me ingi'ccu can'jen'ninda ¿ma'caen gi ingija qqen vana'jen'fa? Ingi coenzandeccu Na'su ñotsse tson'jeña'chone condase'choma'qqe gi toya atte'fambi. Nane ‘Na'su tsu ingima Egipto'ye somboen’ qqen su'fa'ni'qqe tsu Na'suja ja'ño ingima antte cuintu madiandeccu ingima mandapa vana'e'jeñe.

¹⁴Tsonsi Na'suja Gedeónma su:

—Japa quenga afe'cho quin'sui'ccu israendeccum madiandeccu'ye ccushaenjan. Ña gi quema moe'jen.

¹⁵Tsa'ma Gedeónjan ccase afapa su:

—Na'su, ¿ma'caen gi ñajan israendeccum ccushaena? Ña aindecu'ja poi Manasés aindecum ti'tsse bove osha'fambi tsu. Toya'caen ñajan ña antiandeccum ñoa'me bove'cco gi.

¹⁶Tsa'caen susi Na'suja su:

—Ña quei'ccu can'jensi qui pa'cco ña manda'choma oshaya. Nane madiandeccuma qui patsuya fae a'ima tssai amppian moenqquia'caen.

¹⁷Tsonsi Gedeónjan su:

—Que ñoa'me ñame in'jamba ñama fuiteye tson'jen qqen su'ta canjaen'choi'ccu ñanga canjaenjan majan qui queja ñai'ccu condase'je.

¹⁸Chigáne jambe'yi va'tti can'jenjan ña japa ña afe'choma ipa quenga ccutsiaña'gae.

Tsonsi Na'suja su:

—Ronda'jeya gi que japa jiya'ngae.

¹⁹Tsa'caen susi Gedeónjan tsaoni japa chivo du'shuma fi'ttipa sho'ccoen. Toya'caen injan'tssia panme ñoñaque'suma cupana'cco me'choa panme matssan. Tsomba aña'choma saporonga ppiñamba aña'cho yo'ccuma'qqe apinga fiñamba i afe Chigama sefacconi'su shondo'sunga tsa roble quini'jin'su tumbianccuni dyai'sunga. ²⁰Tsonsi sefacconi'su shondo'suja su:

—Aña'cho toya'caen cupana'cco me'choa panma'qqe va patunga ccuiñajan. Ccuiñamba yo'ccumajan ombanga fiñajan.

Tsa'caen susi Gedeónjan tsa'caen tson. ²¹Tsonsi sefacconi'su shondo'suja tise accuicco'cho tsutopai'ccu tsa aña'cho toya'caen panma'qqe pporaen. Pporaensi si'nge patu'ye anchandasi pa'cco aña'cho toya'caen pan'qqe me'tsse ju'ru sefa. Tsa'caen tsomba sefacconi'su shondo'su'qqe me'tsse nepi. ²²Tsonsi Gedeónjan ñoa'me Na'su Chigambe shondo'su tsu qqen in'jamba su:

—¡Ay! ¡Ti'tsse Joccapitssia Na'su! ¡Cambajunaccu gi Quema sefacconi'su shondo'suma atte!

²³Tsa'ma Na'suja tisema su:

—¡Opatssse dyombe canjan! ¡Nane paya'bi qui!

²⁴Tsa'caen tsonsi Gedeónjan Chiganga afeye oque oraen'jen'chove ñoñamba tsama inisian “Na'su Chigaja opatssse tson'su tsu.” Ja'ño a'tapan tsaja toya ccutsu Abiezer aindeccu'su Ofra canqueni.

²⁵Tsequi cose'yi tsu Na'suja Gedeónma su:

—Que yaya segundo vaura quitsa'ye coenzama, tsa siete canque'fave an'bian'choma, angaja. Toya'caen que yayambe chiga Baalnga afeye oque'je'choma asi'ttapa tse'tti ccutsu'cho chiga Asera quini'ccoma'qqe ttuttuja. ²⁶Tsomba Na'su Chiga in'janquia'caen ño'an oque'je'chove ñoñajan va ccotta'cco ombanga Na'su que Chiganga afeye. Tsomba tsa chiga Asera quini'ccoma si'tsive accoshapa tsa segundo vaura quitsa'yema oque oraemba Nanga afeja.

²⁷Tsa'caen susi Gedeónjan diez tise'be semasundeccui'ccu Na'su mandaquia'caen tson. Tsa'ma tise antiandeccuma toya'caen tsa canque'su tsandiendeccuma dyojopa cose tsa'caen tson. Ñoa'me dyojopa a'taja tson'fambi. ²⁸Ccaqui a'tasi tsa canque'su tsandiendeccuja jangipa atte'fa Baalnga afeye oque'je'cho asittaye'choma, tseni ccutsu'cho Asera quini'ccoma'qqe tayo ttuttu'cho. Toya'caen cuna oque'je'chonga segundo

vaura quitsa'yema oquepa afe'choma'qqe atte'fa. ²⁹Attepa tisupapora iñajampañacco'fa: “¿Majan tsu jova'caen tson?”

Tsomba ñoa'me atesuye in'jamba iñajampaña'fasi faesu tsu condase Joás dutssi'ye Gedeón tsa'caen tson'chove. ³⁰Conda'fasi tsandiendeccuja Joásni japa quian'me manda'fa:

—Que dutssi'yema somboenjan ingi fi'ttiye. Nane Baalnga oque'je'choma asi'ttapa tse'tti cutsu'cho Asera quini'ccoma'qqe ttuttu'chone tsu tiseja paya'cho.

³¹Tsa'ma Joásja iyiccayesundeccumu su:

—¿Jongoesie qui Baalve in'jamba tisene afa'fa? ¿Que'ita ti qui tisene se'pipa iyiccaye in'jan'fa? Nane majan Baalve in'jamba iyicco'ninda tsu tu'i toya a'tambi'te fi'ttiya'cho. Baal ñoa'me Chigamanda antteja cuintu tsuyi tisenga oque'je'choma asitta'suma vanaeñe.

³²Gedeón Baalnga oque'je'choma asi'tta'chone tsequi a'tayi ashaemba tisema inisian'fa Jerobaalve, “Baalja tsuma coira'su” qquen su'chove.

³³Omboe tsu poi madiandeccu, amalecitandecu toya'caen poi'yi'cco cca'i chiga sombo'jefa'su aindecu fae'ngae bopa Jordán na'ema isepa Jezreel sinjunccuni tise'pa carpama ccutsutsian'fa. ³⁴Tsonsi Na'su Chiga Qquendya'pa Gedeónma in'jaensi tsonjen'choma jeñamba ttu'se poi Abiezerndecu cuintu tiseni bo'faye. ³⁵Toya'caen tsu condasundeccumu moe Manasés, Aser, Zabulón toya'caen Neftalíndecunga cuintu tsendeccu'qqe bopa tisema cachuicco'faye.

³⁶Tsomba Gedeónjan Chigama su: “Que suquua'caen ña tivei'ccu israendeccumu ccushaeñe tson'jen'da qquen tsonjan: ³⁷Ñajan oveja ttono tosepama trigoma qqesho'je'ttinga ccuiñaña. Tu'i sinte tsa ttono'su tose tssipasi pa'cco tse'tti'su ande santssisi gi in'jaña queja que suquua'caen ña tivei'ccu israendeccumu ccushaeña.”

³⁸Ccaqui a'tasi tsa'caen tsu da. Nane Gedeón sinte'yi jangipa tsa oveja tosema mandyisi suruno'su tsa'ccuja fae tasa on'batsse omba. ³⁹Tsomba Gedeón ccase Chigama su: “Ñama iyicca'yejama, tsa'ma ccase gi iñajampañamba atesuya va tosepa oveja ttonoi'ccu. Ja'ño antteja cuintu tosepa ttono santssisi pa'cco andeja suruno tsa'ccui'ccu tssipaye.”

⁴⁰Tsequi cose tsu Chigaja tsa'caen tson. Nane tosepa ttonojan santssisi pa'cco ande tsu surunoi'ccu tssipa'cho.

Gedeón madiandeccumu patsu'cho

7 ¹A'taningae tsu Jerobaal, tsa Gedeónjan, poi'yi'cco tise sundarondecui'ccu Harod tsa'ccu sombo'jeni bopa can'jen'fa. Tsene'da tsu Madiandeccu can'jen'choja nortefa faesu sinjunccu tsa More ccotta'ccoi'ccu pporotsse.

²Tse'ttinga tsu Na'su Chigaja Gedeónma su: “Panshaen tsain'bitssi sundarove qui i. Nane israendeccu ana'faya'chove ña anttesi madiandeccumu gana'da tsu tisupayi oshapa gana qquen in'jan'faya. ³Tsa'cansi poi'yi'cco tsandiendecunga condaja: ‘Poi'yi'cco majan dyojo'ma jayi'ta tsu toequi shandaye osha'fa tise'pa tsaoni.’”

Tsa'caen susi pañamba Gedeón condasi tsu veinte y dos mil tsandie shanda'fa. Tsa'ma toya tsu diez mil can'jen'fa. ⁴Tsa'cansi Na'suja ccase Gedeónma su: “Toya tsu panshaen tsain'bitssi sundaro. Poiyi'ccoma nai'quini angasi gi quenga canjaeñe majan quei'ccu ja'faya'chove, toya'caen majan toequi shanda'faya'chove.”

⁵Tsa'caen susi Gedeónjan sundarondeccuma nai'quini anga. Tsonsi tsu Na'suja su: “Tivei'ccu ichhoipa tisu menzanza'fai'ccu ain'caen cu'i'cho sundarondeccuma attufaenjan tsutta'choi'ccu puntssandyaipa cu'i'cho sundarondeccu'ye.”

⁶Tsa'caen tsomba attesi jo'su tresciento a'iyi tsu tivei'ccu ichhoipa aya'fanga angapa ain'caen cu'i'chondeccu. Poiyi'cco cca'indeccu tsu tsutta'choi'ccu puntssandyaipa cu'i'fa. ⁷Tsonsi Na'suja Gedeónma su: “Tsa tresciento a'i'ccuyi gi que'ima ccushaemba madiandecuma afeya cuintsu que'i tise'pama patsuye. Cca'ija poiyi'cco tsu ja'faya'cho tise'pa tsaoni.”

⁸Tsa'caen susi Gedeónjan poiyi'cco cca'indeccuma tise'pa tsaoni jaye moe. Tsa'ma tise'pa api, tsonjen'choma'qqe isupa moe. Moemba jo'su tresciento a'i'ccuyi catiye. Tse'ttieta tsu madian'su sundarondeccumbe carpa sheque'choja sinjuncuni. Tsambe tansin'choni tsu Gedeónjan can'jen.

⁹Tsequi cose Na'suja Gedeónma su: “Jangipa andeja madiandeccu'su carpani. ¡Ñoa'me gi tsendecuma quenga afeya cuintsu que tise'pama patsuye! ¹⁰Tsa'ma toya iyiccoye dyojo'ta carpa sheque'chonga a'tutsse quema shondo'su Furai'ccu ¹¹japa tise'pa condase'je'choma paña'faja. Tsomba qui dyoe'suma pasapa madiandeccu'ccu iyiccoye jaye osha.”

Tsa'caen susi Gedeón, tisema shondo'su Furai'ccu andepa a'tutsse carpa sheque'chonga catse'fa. ¹²Nane madiandeccu, amalecitandeccu toya'caen faesu chiga sombo'jefa'su aindecuaja jongoesu a'ju shequequia'caen tsu tsa sinjuncuni on'batsse can'jen'fa. Tise'pa cameyo'qqe tsain'bitssipa mar ofafa'su sisipama agattoye oshambi'tssiquia'ca'on. ¹³Tseni nepipa Gedeónjan paña fae sundaro tise ayo'o'choma qqen condase'je'choma:

—Ayo'o gi. Nane cebadama ñoña'cho pan funui'cho'cco mutsinoi jipa va carpa sheque'chonga amppipa fae carpanga quian'me desi osuipa amppi.

¹⁴Tsa'caen condasesi tise amigoja su:

—Tsa panda tsu israendeccu'su Joás dutssi'ye Gedeón matichi'ccu ingima fitti'ttiya'cho. Nane Chiga tsu Gedeónga antte cuintsu tiseja poi madiandecuma patsupa tsani sheque'cho carpama'qqe metsse patsuye.

¹⁵Gedeónjan jongoesune ayo'ochove conda'choma pañamba avujatsse Na'su Chigama afa. Toequi Israel sundarondeccu can'jeni japa qqen su:

—¡Jangi'faja! ¡Ñoa'me tsu Na'su Chigaja antte ingi madiandecuma patsu'faya'chove!

¹⁶Tsomba tsa tresciento tsandiendecuma attufaen tres naccuve.

Attufaemba poiyi'cconga tsonjen'choma afepa toya'caen apima'qqe afe. Tsa apiccunga tsu singete'cho setsa'je'cho tuñoma a'tutsse an'biaña'cho.

¹⁷Tsomba Gedeónjan su: “Ña carpa sheque'chombe jofa'su utufanga nepipa ma'caen tson'nijan que'i'qqe ñama cambia ¡ma'de'faja! ¹⁸Nane ña, toya'caen

ñai'ccu jasundeccu tsonjen'choma jeña'fasi paña'da que'i'qqe poiya'cco carpa sheque'choma shoquendi ccutsupa que'i tsonjen'choma jeñamba qqen fundo'faja: 'iNa'su Chiga, toya'caen Gedeónme'qqe in'jamba patsu'faja!'"

¹⁹Tsa'caen supa Gedeónjan tise'ccu jaya'cho cien a'i'ccu carpa sheque'chombe jofa'su utufanga nepi'fa. Ñoa'me enttinge cosesi madiandeccu tseyi faesu sundarondeccoma cambiamba ronda'suve ccutsian'fa. Nepipa jundeyi tise'pa tsonjen'choma jeñamba anga'cho apima dojo'fa. ²⁰Nane tsa tres naccu poiya'cco tsonjen'choma jeñamba fae'ngatsse apima dojo'fa. Tse'faei'ccuyi singete'cho tuño anchandasi pavefa'su tivei'ccu tsama yasapa tansinfa'su tiveni tsonjen'choma an'biamba qqen fae'ngae fundo'fa:

"iNa'su Chiga, toya'caen Gedeónme'qqe in'jamba matichi'ccu patsu'faja!"

²¹Tsa'caen tsomba poiya'cco tise'pa ccutsu'ttie carpa sheque'choma shoquendi ccutsu'fasi tsu madiandeccuja dyopa fundopa ccuya'fa. ²²Nane tsa tresciento tsonjen'choma fae'ngae jeñasi tsu Na'su Chigaja madiandeccoma in'jaen cuintu poiya'cco dyopa tisupanaccu matichi'ccu iyicco'faye. Poi madián'su sundarondeccu tsu Bet-sitani toya'caen Zererani'su tsaiquiningae buttopa ccuyayain ja'fa. Nane Abel-mehola andeni ppo'rotsse ja'fa Tabat canqqe jini.

²³Toya'caen tsu Gedeónjan Neftalí, Aser toya'caen Manasés'su tsandiandeccoma ttu'se cuintu madiandeccoma omboen'faye. ²⁴Efrainsundeccu ccotta'cconi can'jen'chonddecunga'qqe Gedeónjan condasundeccoma moe qqen su'choi'ccu: "Jipa madiandeccoma mandian'faja. Jordán naini o'tie japa Bet-barapie se'pi'faja tsendeccu ise'fasa'ne." Tsa'caen ttu'sesi poi Efraíndeccu ttupa Jordánma ise'faye se'pi'fa Bet-barapie. ²⁵Toya'caen tsa dos madián'su nasundeccoma, tsa Oreb toya'caen Zeebma indipa fi'tti'fa. Nane Orebma fitti'ttima tsu inisian'fa Oreb patuve. Toya'caen Zeebma fitti'ttima tsu Zeeb vino tsa'ccuve sombo'je'ttive inisian'fa. Tsa'caen madiandeccoma mandian moemba Oreb tsove toya'caen Zeeb tsovera Jordán naini ipa Gedeónga afe'fa.

Sansónma isu'cho

13 ¹Ccase israendeccu Na'su Chigama pañambiqquia'caen egae tsincon'fasi Na'suja ante cuintu cuarenta canqqe'fave filisteondeccu tise'pama patsupa manda'jeye.

²Zora canqqeni tsu israe'su Dan aindecu'su tsandieja can'jen. Tise iniseja Manoa. Manoa pusheja dusumbipa du'shu me'cho canse. ³Tsa'ma Na'su Chigama sefacconi'su shondo'suja Manoa pushenga attiamba su: "Queja du'shuve isuye oshambi'pa qui me'cco canse. Tsa'ma ja'ñonda qui surive dapa tsandie du'shuve isuya. ⁴Tsa'ma ñotsse in'janjan: Vino ni faesu ccusianqqe'suma cu'ijama. Toya'caen se'pi'cho aña'choma'qqe anjama. ⁵Tsandie du'shuve qui isuya. Tiseja tisu tosema chattu'jeya'bi tsu. Nane tsa du'shuja toya isuyembiteyi Chiga ñotsse injan'chopa tsu nazareo a'iya. Tisei'ccu tsu Na'su Chigaja ashaeña israendeccoma filisteondeccu'ye ccushaeñe."

⁶Tsa'caen susi pushesuja tise tsa'ndunga japa pa'ccoma condase: “Chigambe a'i tsu ñanga ji. Ñoa'me dyo'tsse Na'su Chigama shondo'sia'caen tsu attian. Tise mane ji'chove gi iñajampañambi. Ni tise'qqe tisu inisema condambi. ⁷Tsa'ma qqen tsu ñama su: ‘Queja surie dapa tsandie du'shuve isuya. Tsa'camba ni vino ni faesu ccusianqqe'suma cu'ijama ni se'pi'cho añ'a'choma'qqe anjama. Nane du'shuja isuyepa paya'ngae tsu Chigambe nazareo a'ya.’”

⁸Tsama pañamba Manoajan qqen Na'su Chigama iñajan: “Na'su Chiga, chigáne que moe'cho a'ima ccase inginga moejan cuintu ma'caen tsandie du'shuma isupa coeñaña'chove inginga condaye.”

⁹Chigaja Manoama pañamba ccase Tisema sefacconi'su shondo'suma pushesunga moe nasipani can'jen'chonga. Attepa tise tsa'ndu tisei'ccu can'jembisi ¹⁰cushoan'me tise ma condaye japa qqen su:

—¿Ccase tsu ji faesu a'ta ñanga attian'cho a'!

¹¹Pañamba Manoa jangipa tise pushei'ccu nasipani ja. Japa a'ima cachuipa iñajampaña:

—¿Que ti qui faesu a'ta ña pushei'ccu condase'su?

Sefacconi'su shondo'suja su:

—Ju, ña gi.

¹²Tsonsi Manoa tise ma iñajampaña:

—¿Minga'ni que inginga su'cho nepi'ninda, ma'caen tsomba gi tsa du'shuma coeña'faya'cho? ¿Mingae gi tsai'ccu tson'faya?

¹³Na'su Chigama sefacconi'su shondo'suja su:

—Que pushe tsu pa'cco ña suquua'caen tsoña'cho. ¹⁴Nane o'fa tsaja jincho'cho'suma ambe'yi ni vino ni faesu ccusianqqe'suma cu'imasia. Toya'caen se'pi'cho añ'a'choma'qqe tsu ambe'yi canseya'cho. Nane pa'ccoma tsu ña mandaquua'caen tsoña'cho.

¹⁵Tsonsi Manoajan Na'suma sefacconi'su shondo'sunga su:

—In'jan'fa gi va'tti que can'jen'ni ingi japa chivo du'shuma quembe sho'ccoemba iye.

¹⁶Chigama sefacconi'su shondo'suja su:

—Que ñama se'pisi canjen'anqqe añambi gi que añ'a'choma. Tsa'ma oque oraña'chove ñoñamba Na'su Chiganga afeja.

(Manoajan toya tsu atesumbi tsa al'ija ñoa'me Na'su Chigambe sefacconi'su shondo'suve.) ¹⁷Tsonsi Manoajan Na'sumbe sefacconi'su shondo'suma iñajampaña:

—Condaja jongoesu inise qui, toya'caen minga'ni que suquua'caen dasi cuintu ingi quema ñotsse afa'faye.

¹⁸Tsa'caen iñajampañasi su:

—¿Jongoesie qui ña inisema atesuye in'jan? Tsaja ñoa'me atesu'ma'sia tsu.

¹⁹Tsonsi Manoajan chivo du'shu toya'caen trigoma'qqe afe'chove ipa patunga ccuiñamba Na'su Chiganga oquepa afe. Afepa toya caña'jen'fa'ni Na'suja ccaningae tsonsi bo'yo'e dapa can'boen'fa. ²⁰Nane oque oraen'cho si'nge anchandasi tsu Na'su Chigama sefacconi'su shondo'suja si'ngenga

ca'nimba sefacconi ansunde. Tsama atepa Manoa tise pushe'qqe camba'ju'i'ccu andenga amppi ccui'fa. ²¹Na'suma sefacconi'su shondo'suja ccase Manoa toya'caen tise pushenga attiambisi Manoajan in'jan ñoa'me Na'su Chigama sefacconi'su shondo'su tsu. ²²In'jamba tise pushenga su:

—iÑoa'me gi paye tson'jen'fa tayo Chigama atepa!

²³Tsa'ma tise pusheja su:

—Ñoa'me Na'su Chiga ingima fi'ttiye in'jan'choecan'da tsu ingi oquepa afe'cho ni ingi trigo afe'choma'qqe in'jambiye'can; ni osha'choma canjemb'i'ye'can ni jongoesuma'qqe condambiye'can.

²⁴Omboe pushesuja tsandie du'shuve isupa tisema inisian Sansónme. Tsa coenjinsi Na'suja tisema ñotsse tson'jen. ²⁵Toya Sansón Dan aindeccu can'jeni can'jen'ni tsu Chiga Qquendya'pa tisema in'jaeñe ashaen. Tise'pa can'jen'tti tsu Zora toya'caen Estaol canqqe enttingeni.

Sansón pushe'cho

14 ¹Sansónjan coemba Timnat canqqeni japa chu'a filisteo'su pushesuma atte. ²Attengapa jipa tise yaya tise mamama su:

—Timnatni japa gi filisteo'su pushesuma atte. Tisema afa'faja ña pusheye.

³Pañamba tise yaya tise mama'qqe su'fa:

—¿Que antiandeccu'suta ti ñotssia pushesuta jimbi? ¿Israendeccu'su ñotssia pushesuta ti jimbi? ¿Jongoesie qui Chigave in'jambi'choa filisteondeccu'su pushesuma pusheye in'jan?

Tsa'ma Sansónjan tise yayama su:

—Tsa pushesu tsu ñoa'me ña in'jan'cho. Tisema gi tisu pusheve in'jan.

⁴(Nane tise yaya tise mama'qqe atesu'fambi tisema Na'su Chiga in'jaensi tsa'caen in'jan'chove. Nane filisteondeccu israendeccumama patsupa manda'jesi Na'su ma'caen tsomba filisteondeccuma dañña'chove ttatta'je'choma atesu'fambi.) ⁵Tsa'caen supa Sansón, tise yaya tise mama'qqe fae'ngae Timnatni ja'fa. Sansón Timnat'su ofa tsaja nasipanga nepipa tise mama tise yayama o'tie jayisi tse'faei'ccuyi chu'a ttesi quin'an fundopa tisenga butto catse. Catsesi ⁶Na'su Chiga Qquendya'pa Sansónma fuitesi tisu tivei'ccuyi ttesima sirian cati chivo du'shu chu'ama fi'ttiqquia'caen. Tsa'ma tsa'caen tsomba tise yaya ni tise mamanga condambi. ⁷Timnatni nepipa tsa pushesui'ccu condasepa ñotsse injanccopa pusheye afa'fa.

⁸Omboen tsa pushesuma pusheye ccase Timnatni jayipa tisuyi ccafanga ja ttesi pajin ccui'choma cañe. Japa atte tsani tuño nasi tsao'paensi cuñajun'cho jinchoma. ⁹Attepa tivei'ccu tsomi somboemba án jayi. Tsa'caen jayipa tise yaya tise mamama cachuipa tise'panga'qqe afe. Isupa an'fa'ni'qqe Sansónjan tise'pama condambi ttesi papa ccui'chombe ai'vo'su cuñajun'choma isu'chove.

¹⁰Sansón yaya pushesui'ccu osha'chove ñoñasi tsu Sansónjan fiestaen'jen tisupa ma'caen atesuqqeningae. ¹¹Tsa'ma filisteondeccuja

tisema dyojopa treinta tsa canqqe'su tsandideccu tise fiestani can'jen'fa. ¹²Fiestaen'jeni tsa treintanga Sansónjan su:

—Va ña su'choma in'jamba condacan'faja. Siete a'tangae toya fiesta ji'niñi que'i in'jamba conda'fa'ninda gi que'linga afeya treinta tso'singa ondiccuque'su totoa lino sarupa ondiccu'je toya'caen treinta ñotssia fiesta ondiccu'jema'qqe. ¹³Tsa'ma va ña su'cho in'jan'choma condaye osha'fambi'ta que'i qui ñanga tsa'caen treinta tso'singa ondiccuque'su lino ondiccu'je toya'caen treinta ñotssia fiesta ondiccu'jema afe'faya'cho.

Tsonsi tsu su'fa:

—Ñotssi tsu. Que in'jan'choma inginga condacanján ingi pañamba in'jancañe.

¹⁴Tsonsi Sansónjan su:

“An'su'ye tsu anqqe'suja sombo.

Majan quin'an'ñe tsu ansintssiaja sombo.”

Tres a'ta pasa'ni'qqe toya tsu tsa su'choma condaye osha'fambi.

¹⁵Cuarto a'tanga toya oshambipa iyicca'yepa Sansón pusheni jipa su'fa:

—Que tsa'nduma noñangiamba inajampañajan cuintsu tise su'choma a'tatsse inginga condaye. Condambian'da gi que tsa'oma oquepa que, que yayapama'qqe fi'ttiya. ¿Aquia ingimbema cca'nañe in'jamba ti qui ttu'se'fa?

¹⁶Tsonsi Sansón pusheja Sansóni jipa i'namba munsimba su:

—Queja ñama chi'ga. Noa'me qui ñama in'jambi. Ña aindeccunga que in'jan'choma afapa ñangaja a'tatsse que in'jamba su'choma condambi.

Tsa'caen i'namba susi Sansónjan su:

—Ju. Ni ña yaya ni ña mamanga conda'can gi quengata bove condaya.

¹⁷Tsa'ma panshaen inajampañamba septimo a'tangae i'nasi Sansónjan quimbipa tisenga conda. Nane septimo a'ta tsa fiesta pasaya'cho a'ta tsu tisenga conda. Condasi pañamba tse'faei'ccuyi tise pusheja aindeccunga japa tise tsa'ndu su'cho in'jan'choma conda.

¹⁸Pañamba tsa septimo a'ta toya chiga amppimbi'te tsa canqqe'su tsandideccuja Sansóni jipa su'fa:

“Metssi tsu cuñajun'choma ti'tsse ansintssia've.

Metssi tsu ttesima ti'tsse quin'anme.”

Pañamba Sansónjan su:

—Ña vaura pushei'ccu andema dyan'dyambiecan'da toya qui ña in'jamba su'choma atesu'fambiye'can.

¹⁹Tsonsi Na'su Chiga Qquendya'pa tisema in'jaensi Sansónjan Ascalón canqqeni japa treinta a'ive tsa canqqe'su tsandideccuma fitti'tti. Fitti'ttipa tsendeccumbe ondiccu'jema oshichhaemba ipa afe tise in'jamba su'choma condasundeccunga. Tsa'caen tsomba ñoa'me iyicca'yepa somboin ja tise yaya tsaoni. ²⁰Sansón tsa'caen iyicca'yepa jasi pushesu yaya tsu Sansón pushema afe tisema shondo'sunga, tsa casara'choni fae'ngae ccutsu'su tsandienga.

Sansón iyicca'yepa tson'cho

15 ¹Can'jemba trigoma taiteve nepisi Sansónjan Timnatni tise pushema can'su jayipa chivo du'shuma'qqe anga. Nepipa su: —Ña pushe cuartonga ca'nimba atteye gi in'jan.

Tsa'ma pushesumbe yayaja ca'niñe se'pi, qqen supa:

²—Tsangae ti qui tisema chi'gapa ja qqen in'jamba gi quema shondo'sunga tayo afe. Tise que'tte tsu ti'tsse me'detssi. Tsama pusheja coenzama pushepa pasa'chone.

³Tsa'caen susi Sansónjan ñoa'me iyicca'yepa su:

—Que'i tsa'caen ñama egae tsonsi ñotssi tsu ña iyicca'yepa filisteondeccuma dañe.

⁴Tsa'caen supa japa tresciento pandove indipa tise'pa atsefanaccu tandan dos, dosve. Tandamba poi dos atse'fa tandan'chonga singete'cho tuñoma tandan. ⁵Tsomba tuñoma setsa'tsaemba pandondeccuma fetta maña filisteondeccu toya taimbi'choa trigo nasipanga. Moesi japa taipa boña'cho toya'caen toya taimbi'choa trigoma metsse oque cati'fa. Nane ofa tsaja nasipa toya'caen olivo quinisicoma'qqe metsse oque cati'fa.

⁶Oquesi filisteondeccu majan tsa'caen tson'chove ñajampañasi tsu su'fa:

—Sansón, tsa Timnat'su du'su, tise pushema tisema shondo'sunga tise quitsa ccashe'ye afesi iyicca'yepa tsa'caen tson'chove.

Pañamba filisteondeccu japa Sansón pushe, tise yayama'qqe oque cati'fa. ⁷Tsonsi Sansónjan ti'tsse iyicca'yepa su:

—Que'i jova'caen tsincon'ninda gi anttembe'yi que'ima dañe.

⁸Tsa'caen supa dyo'tssia putsa'suve dapa tsain'bitssi filisteondeccuve fitti'tti. Fitti'tti nanimba japa Etam patu'su changoni canse.

⁹Tsonsi filisteondeccu Judá andeni jipa tise'pa carpama ccutsutsian'fa Lehini. ¹⁰Tsa'caen ji'fasi Judá'su aindeccu catsepa ñajampaña'fa:

—¿Jongoesie qui ingi'ccu iyicoyeta ji'fa?

Tsonsi tsu su'fa:

—Sansónma indiye gi ji'fa cuintsu tise inginga tson'chone afepoñe.

¹¹Tsa'caen pañamba tres mil Judá'su aindeccu bopa Etam patu'su changoni japa Sansónma su'fa:

—¿Atesumbi ti qui filisteondeccuja ingi nasundeccu tsu? ¿Jongoesie qui tsa'caen tsincomba tise'pama iyicca'yeañ?

Sansónjan su:

—Nane tise'pa ñama tsonqquia'caen gi ccane'qqe tise'pama tson.

¹²Tsonsi tsu Sansónma su'fa:

—Quema indipa tandamba filisteondeccunga afeye gi ji'fa.

Tsa'caen su'fasi Sansónjan ñajampaña:

—Tansintsse su'faja ¿que'ita ti qui ñama fi'tti'faya'bi?

¹³Tsonsi tsu su'fa:

—Me'in, ingija quema fi'tti'faya'bi gi. Tsa'ma aqquia quema tandamba tise'panga afeye gi ji'fa.

Tsa'caen supa Sansónma dos cuna sogai'ccu tandamba somboen'fa tise a'tupa can'jene. ¹⁴Filisteondeccu canjen'cho Lehini nepijisi attepa filisteondeccu avujatsse fundocopa sombo'fa. Tsa'caen fundopa ji'fasi Na'su Chiga Qquendya'pa Sansónma in'jaensi tisema tandan'cho sogama jongoesu lino ju'ru shequequia'caen tisu tivei'ccu opattu shequian. ¹⁵Opattu ttovapa tse'tti boro ccotai'cco'su tsu'tta cuna ccui'choma isupa tsai'ccu mil tsandideccuve fitti'tti.

¹⁶Fitti'tti nanimba su:

“Boro ccotai'cco'su tsu'ttai'ccu gi
dos boñame tson.

Boro ccotai'cco'su tsu'ttai'ccu gi
mil tsandideccuve fitti'tti.”

¹⁷Tsa'caen afa nanimba boro cataicco'su tsu'ttama ttova cati. Tsa ccotta'ccoma ja'ño a'ta pan tsu Ramat-lehi qqen inisiancho'fa, ccotai'cco'su tsu'tta ccotta'cco qqen suye.

¹⁸Tsomba tsa'caen fitti'tti nanimba ñoa'me tsaqqie'supa Na'su Chigama quian'me afapa qqen su: “¿Ma'caen qui tayo ña patsuya'chove tsomba ja'ñojan antte ña tsaqqie'supa va Chigave in'jambindeqquianga payeta?”

¹⁹Tsa'caen afasi Chiga Lehi ccotta'cco'su tsa'ccu sombo'je'ttima fettasi tsa'ccuja sombo. Sansónjan tsa'ccuma cu'ipa ccase quin'supaen dapa ccusha. Tsa'cansi tsu tsa tsa'ccu Lehini sombo'je'ttima ja'ño a'ta pan En-hacore'qqe inisiancho'fa.

²⁰Sansónjan veinte canque'fave israendeccuma angacan filisteondeccu manda qqen tson'jeinte.

Sansón Gazani japa tson'cho

16 ¹Fae a'ta Sansónjan Gaza canqueni japa tisu ai'voi'ccu gana'su pushesuma atte. Attepa tsambe tsa'onga ca'ni tsequi cose tisei'ccu anañe. ²Ca'nisi Gaza'su aindeccuja paña'fa tsa canqueni Sansón can'jen'chove. Pañamba itoye ttupa tsequi a'ta cose'tsse canquembe sombo'ttinga ronda'fa tise sombojisi indiye. Tsa'caen cosepa quimbipa ño'faye tisupa tsaoni ja'fa ccaqui sinte fi'ttiye qqen in'jamba. ³Tsa'ma Sansónjan enttinge coseya'ngaeyi can'jemba jangipa japa canque sombo'tti'su piccofin'dima indichoya'chove dyaiña'choi'ccu fae'nga pa'cco quini'ccongá yavian'choma sai isupa opipa anga Hebrón isevetssia'su ccotta'ccongá. Tseni angapa ccuiña.

Sansón Dalilai'ccu tson'cho

⁴Omboe tsa Sansónjan Sorec sinjuncuni'su pushesuma attepa ñotsse in'jan. Tise iniseja Dalila. ⁵Tsonsi filisteo'su nasundeccu Dalilani jipa su'fa:

—Osha'ta tta'ttapa atesuja tise jongoesui'ccu tsa'caen quin'anme da'chove. Toya'caen tta'ttapa atesuja ma'caen tisema patsupa tandamba an'biaña'chove.

Que oshapa atte'ninda ingi poiya'cco gi mil ciento corifin'dive quenga afe'faya.*

⁶Tsa'caen su'fasi Dalila Sansónma su:

—Chigáne ñanga condaja ¿queja jongoesui'ccu qui tsa'caen quin'anme da? ¿Jongoesui'ccu tandansi qui opattuye oshaya'bi?

⁷Tsonsi Sansónjan co'fepa su:

—Siete battittianccu'su tandan'fa toya sambambi'choai'ccu tandan'ninda gi tsainfambie dapa faesu a'ia'caen injanga quingo'jeya.

⁸Pañamba condasi filisteo'su nasundeccuja siete cuna toya sambambi'choa battittianccu'su tandan'fama ipa Dalilanga afe'fa. Afesi tsai'ccu Dalilaja Sansón ana'jen'choma tandan. ⁹Tsomba tsandiendeccu a'tutsse cuartoni ronda'jesi Sansónma fundopa su:

—¡Sansón, injama'tse! ¡Filisteondeccu quema indiyé ji'fa!

Pañamba Sansónjan battittianccu'su tandan'fama opattu shequian simba'fa si'ngenga pporopa ttuquia'caen. Tsa'caen tsonsi filisteondeccuja tise jongoesui'ccu quin'go'chove toya in'jan'fambi. ¹⁰Tsonsi Dalilaja Sansónma su:

—Queja afopoemba ñama sumbive attien. Tsa'ma chigáne ñanga condaja ma'caen quema tandaña'chove.

¹¹Sansónjan su:

—Cuna sogá toya tandan'jembi'choai'ccu tandan'ninda gi tsainfambie dapa faesu a'ia'caen injanga quingo'jeya.

¹²Tsa'caen supa ana'jensi Dalilaja Sansónma cuna sogai'ccu tandan. Tandamba faesu aindeccu cuartoni indiyé ronda'jesi Sansónma fundopa su:

—¡Sansón, injama'tse! ¡Filisteondeccu quema indiyé ji'fa!

Pañamba Sansónjan tivema tandan'cho sogama ttuña cati iro chipirima ttuñaquia'caen. ¹³Tsa'caen tsonsi ccase Dalilaja Sansónma su:

—Ja'ño'qqe qui afopoemba ñama sumbive attien. Ñanga condaja ma'caen quema tandaña'chove.

Sansónjan su:

—Ña tsove'su tosema siete boña'fave indipa sarupave ugaje'cho iroi'ccu fa'ngae ota'tapa yoshavai'ccu ta'ya've indian'ninda gi tsainfambie dapa faesu a'ia'caen injanga quingo'jeya.

Tsa'caen supa ana'jensi Dalilaja tise tosema siete boña'fave indipa sarupave otata'je'cho iroi'ccu fa'enga ota'tapa ¹⁴yoshavai'ccu ta'ya've indian. Indiamba Sansónma fundo:

—¡Sansón, injama'tse! ¡Filisteondeccu quema indiyé ji'fa!

Sansónjan qquendyapa pa'cco tisema otatapa yoshavai'ccu indian'choma ucca cati. ¹⁵Tsonsi Dalila tisema su:

* 16.5 Cinco filisteo'su nasundeccu tsu. Corifin'di tsu cinco mil quinientove nepi.

—Afopa'cho aqquia ti qui ñame ñotsse in'jan qquen su. Nane tayo tres se ñanga afopoemba ñama sumbive attien'ma qui toya ñanga condambi ma'caen dapa que tsa'caen quin'go'je'choma.

¹⁶Tsa'caen poi a'ta panshaen toeveyi ñajanse'poensi Sansónjan paña'ma quimbi. ¹⁷Tsa'caen quimbipa pa'ccoma a'tatsse tisenga conda:

—Minguite'qqe gi ña tosema cha'ttupa cansemi. Nane toya ñama isu'fambi'te gi Chigambe nazareo a'ive dapa tosema chattumbe'yi coemba canse. Ña tosema cha'ttuni'da gi tsainfambie dapa faesu a'ia'caen injanga quin'gopa canseya.

¹⁸Pa'ccoma tansintsse conda qquen in'jamba Dalilaja filisteo'su nasundecunga qquen conda'choma moe:

—Ccase fae seyí jifaja. Pa'ccoma tsu tiseja ñanga tansintsse conda.

Tsonsi ccase filisteo'su nasundecuja tise'pa corifin'di'ccu jif'a. ¹⁹Dalilaja Sansón tsovema tisu ttena'gonga opipa anae. Tsa'caen anaemba a'ima ttu'se cuintsu tise sietefave uga'cho tosema chattuye. Tsa'caen tosema chattupa tayo tisema patsuye ashaen qquen in'jamba ²⁰Dalilaja quian'me Sansónma fundo:

—¡Sansón, injama'tse! ¡Filisteondeccu quema indiye jif'a!

Sansónjan qquendyapa in'jan: “Tayoe tsonquia'caen tsomba tsuma ccushaene.” Tsa'ma atesumbi Na'su Chiga tisei'ccu can'jembi'choa've.

²¹Tsonsi filisteondeccu tisema indipa tise tso'fema boi somboemba tisema anga'fa Gaza canqueni. Tseni angapa tise tivema cu'a yoshava candenai'ccu tandamba picco'je'ttinga piccopa manda'fa cuintsu trigoma sunda'jeye.

²²Tsa'caen piccoyepa can'jen'ni tise toseja ccase sho'yoye ashaen.

Sansón pa'cho

²³Filisteo'su nasundecuja avujatsse bo'fa tise'pa chiga Dagóna ñotssia afe'choma oquepa afeye. Tsa'caen bopa qquen settapoen'fa:

“Ingi chiga Dagón tsu ingi'ccu iyicco'su

Sansónma patsupa inginga afe.”

²⁴Toya'caen filisteo aindecu'qqe Sansónma atepa qquen afapa settapoen'fa:

“Ingi chiga tsu ingi'ccu iyicco'suma patsupa

inginga afe.

Nane ingi andema dañomba

ingi aindecuma fitti'tti'chone tsu

ja'ño tisema patsupa inginga afe.”

²⁵Toya tsa'caen avujatssipa fundopa afa'fa: “Sansónma somboenjan ingi tisema cambia fe'ñañe.” Tsa'caen supa Sansónma picco'je'ttie somboemba ccutsian'fa chiga Dagón etti'su dos enttinge'su chan'jime dyaiña'chombe enttingenga. ²⁶Tse'tti ccutsupa tise tive'ye fendepa angacan'su du'shuma su:

—Ña tivei'ccu tsa dos enttinge'su chan'jime dyaiña'choma pporaemba ccutsuye gi in'jan quimbipa.

²⁷Nane tise tsa'caen sul'je'ni tsu tsa Dagón ettinga on'ba'e tsandiendeccu toya'caen pushesundeccu'qqe bo'fa. Poi filisteo'su nasundeccu'qqe can'jen'fa. Nane Dagón etti omba'su ppappacconga'qqe tsu faesu tres mil a'i bo'fa Sansónma atepa fe'ñañe. ²⁸Tsa'caen bo'fasi Sansónjan Na'su Chigama ñajamba su: “Ti'tsse Joccapitssia Na'su ñama injan'jemba ja'ño fae sey'i'qqe ccase in'jaenjan ña va filisteondeccuma ccane'qqe dañoñe ña dos tso'fema daño'fa'chone.” ²⁹Tsa'caen ñajamba Sansónjan tisu tivema yasapa dosve tsa Dagón etti enttinge'su chan'jime dyaiña'choma pporaen. Tsa dos tsu pa'cco tsa'oma indichoya'chove dyaiña'cho. Tsanga tsu tansinfa'su tivei'ccu fae dyaiña'choma pporaemba pavefa'su tivei'ccu faesuma pporaen. ³⁰Pporaemba Sansónjan qqen quian'me su: “¡Filisteondeccu'qqe ñai'ccu fae'ngae pa'faja!” Tsa'caen supa pa'cco tisu tsain'fai'ccu dyaiña'choma ccofetta. Ccofettasi pa'cco Dagón etti osuisi filisteo'su nasundeccu, poi'ccu tse'ttini can'jensundeccu'qqe otssiye'fa. Tsa'caen tsu Sansónjan tise cansuite fitti'tti'choma pan'shantssi a'ive tisu'ccu fae'ngae fi'tti.

³¹Pañamba tise quinshingendeccu, poi'ccu tise yayambe antiandeccu'qqe ande'fa tise ai'voma isupa angaye. Angapa tisema a'tu'fa tise yaya Manoa atu'ttinga tsa Zora Estaol canqqe enttingenga. Nane veinte canqqe'fave tsu Sansónjan isaendeccuma manda'je.